

22. maj 2019

UPA2019/161

Nunatsinni sygeforsikring atuutilissagalarpat suut pitsaaqutaassanersut suullu ajoqutaassanersut pillugit apeqquteqaat aallaavigalugu oqallisissiaq.

(Inatsisartunut ilaasortaq Siverth K. Heilmann, Atassut)

Inatsisartunut ilaasoq Siverth K. Heilmann, Atassummeersoq, nunatsinni napparsimanermut sillimmasiineq atuutilissagalarpat suut pitsaaqutaassanersut suullu ajoqutaassanersut pillugit apeqquteqaat aallaavigalugu oqallinnissamik siunnersuuteqarpoq.

Oqallisissiami qulequtaritinneqartoq paasinarpog napparsimalernissamut sillimmasiisarneq atuutissagalarpat pitsaaqutaasinnaasut ajoqutaasinnaasullu qulaajaaffigeqquneqartut. Siumumiit paasiuminaatsipparput siunnersuummi qulequtaatinneqartoq, tassami Nunatsinni ullumikkut napparsimalernissamut sillimmasersuinissamut periarfissat arlalissuit atuutereermata aammalu inunnit suliffeqarfinnillu atorluarneqaqalutik.

Aammalu Naalakkersuisut akissutaanni takuneqarsinnaasutut Danmarmi atuuttoq “Sygeforsikringen Danmark” aamma Nunatsinni Savalimmiunilu atuuppoq periarfissaalluni, 60-inik ukioqalereersimangikkaanni. Tamakku saniatigut Nunatsinni aamma bankinit periarfissiisutaasut atorluarneqarsinnaapput, aammalu sillimasiissarfiit assigiinngitsut periarfissiisutaat atorluarneqartarlutik.

Siunnersuuteqartup immaqa eqqarsaatigigunarpaa Danmarkimi atuuttoq “sygesikring” Danmarkimi innuttaaqataagaanni pissarsiarineqarsinnaasartoq, taamaalilluni Danmarkimi sumiikkaluaraanniluunniit peqqinnissaqarfimmit sullinneqarsinnaaneq uppersaasarneqartarluni. Taasumali akileraarutitigut aningaasalersorneqarnerata saniatigut sutigut aningaasartuutaasarnera paasiniagassaqqippoq.

Siumumiit siunnersuutqartumit taakkartorneqartut, soorlu peqqinnissaqarfiup aningaasarpassuarnik atuiffiunera, aammalu sullissinerit ilaasa atuisunit akilernerqartalersinnaaneri pillugit maannakkorpiaq aalajangersimaqqissaartumik oqaatigisinnaanngilarput, tassami Siumumi isumaqaratta Nunatsinni innuttaasut tamarmik naligiimmik akeqanngitsumillu peqqinnissaqarfitsinniit sullinneqarsinnaasariaqartut. Siumumiillu neriuppugut tamanna ukiorpassuarni atuusinnaajumaartoq.

Taamannak naatsumik oqaaseqarluta, oqallisissioortumut qujavugut.

Karl-Kristian Kruse, Siumut